

Banting gergasi di hotel terbiar jadi ikon terbaru Labuan

Oleh KHARUL IDIN

HAMPIR 30 tahun Hotel Labuan yang sekian lama menjadi bangunan terbiar dan hanya mencatatkan pemandangan penduduk Labuan dan pelancong kini bakal menjadi satu ikon pulau bebas cukai itu.

Dahulunya, bangunan Hotel Labuan yang mempunyai 10 tingkat menjadi satu mercu tanda Labuan namun ia telah menjadi bangunan terbiar sejak tahun 1997.

Baru-baru ini, Perbadanan Labuan (PL) telah meletakkan satu banting gergasi "Labuan Pearl Of Borneo" bersaiz 172x72 kaki persegi menjadikan bangunan tersebut menjadi satu lokasi menarik untuk berswafoto bagi penduduk tempatan mahupun pelancong sekaligus mempromosikan pelancongan di Labuan.

Sebelum itu, hasil beberapa tinjauan *Wilayahku* di lokasi tersebut, ramai di kalangan orang awam mengambil swafoto berlatar belakang banting tersebut. Tidak ketinggalan juga penggemar sukan seperti bebasikal, mereka menjadikan ia sebagai satu tempat wajib yang perlu mereka singgah dan berswafoto bersama rakan-rakan.

Dalam lukisan banting tersebut memaparkan lokasi-lokasi menarik di pulau bebas cukai itu serta tempat pelancongan di Labuan seperti Muzium Chimney, Taman Burung dan sebagainya.

Kewujudan banting gergasi "Labuan Pearl Of Borneo" merupakan usaha serta kepekaan PL dalam mewujudkan suasana yang menarik untuk menjadikan pulau ini menjadi



BANTING Labuan Pearl of Borneo di Hotel Labuan kini menjadi tempat tumpuan orang ramai berswafoto.

pulau tarikan pelancongan.

Ketua Pegawai Eksekutifnya, Dr Fary Akmal Osman berkata, PL telah mengambil tindakan dan inisiatif bagi mengatasi masalah bangunan terbiar yang menjejaskan pemandangan.

"Sebelum pandemik COVID-19 melanda negara, kita telah merancang meletakkan banting gergasi tersebut untuk persiapan bagi tahun Melawat Malaysia 2020 namun setelah Perintah Kawalan Pergerakan (PKP) dilaksanakan pada bulan Mei lalu, usaha meletakkan banting tersebut agak lewat sedikit.

"Kita harap seluruh warga Labuan menerima baik dengan inisiatif ini dan bersama-sama merencanakan semula sektor pelancongan di pulau ini," katanya ketika ditemui

Wilayahku.

Mengulas lanjut, beliau berkata banting gergasi ini mempunyai lukisan ikon-ikon pelancongan di Labuan dan secara tidak langsung ia dapat mempromosikan tempat pelancongan yang ada di pulau ini.

Dalam perkembangan lain, beliau berkata hasil lawatan kerja Kedutaan Pesuruhjaya Britian di Labuan baru-baru ini, telah meminta untuk kita meneruskan program *Memorial Day*.

"Pada bulan November tahun ini, kita telah mendapat permohonan dari Pesuruhjaya Britian untuk meneruskan program *Memorial Day* dan kita harap dengan adanya banting gergasi tersebut ia menjadikan satu tempat tarikan baru di Labuan," katanya. **WK**